



Il mas-chalch da Sent

Publicaziuns officialas. Cumpara seguond bsögn.
2006/2008
no. 20

7554 Sent, 16 november 2006 / mw

Publicaziuns da fabrica BAB

Reguarda: Reparaziun da la via Ischlas - Parnarsura, 7554Sent

Patrun da fabrica: Cumün da Sent, Chasa cumünala, 7554 Sent

Profilà: ---

Publicaziun: 16-11-2006

Termin da protesta: 06-12-2006

Publicaziun da fabrica

Reguarda: Ingrondimaint da la tschuffa davant l'entrada, Archas Sura 208A

Patrun da fabrica: Andri Guler, Archas Sura 208 A, 7554 Sent

Ediziun: Ils plans sun exposts in büro cumünal.

Profilà: --

Publicaziun: 16-11-2006

Termin da protesta: 06-12-2006

Reguarda: Plazzas da parcar, Tuols 519 A, parcella nr. 461

Patrun da fabrica: Erich Schweizer, Tuols 519 A, 7554 Sent

Ediziun: Ils plans sun exposts in büro cumünal.

Profilà: 08-11-2006

Publicaziun: 16-11-2006

Termin da protesta: 06-12-2006

Ediziun: Tuot ils plans sun exposts in büro cumünal.

Recuors: Protestas da dret public, cunter quistas publicaziuns, sun d'inoltrar infra 20 dis in scrit, a partir da la data da publicaziun, al Cussagl cumünal.

La cumischiun da fabrica

Radunanza cumünala

La radunanza es gnüda fixada sün **marcurdi, 22 november 2006** a las 20.15 in chasa cumünala.

Tractandas:

1. Protocol da la radunanza cumünala dals 18 lügl 2006, acta 2
2. Barat e vendita da terrain
3. Piazza da sport in Palüzot – Credit brüt da fr. 850'000.--
4. Varia

Remarcha 2. tractanda: Per pudair realisar la piazza da sport faja dabsögn d'üna correctura da cunfin culla parcella vaschina.

Il Cussagl cumünal

Radunanza da vaschins

In marcurdi, **22 november 2006** davo la radunanza cumünala politica ha lö la radunanza da vaschins.

Tractandas:

1. Nouvs statüts dal cumün da vaschins
2. Dumonda da vaschinadi
3. Varia

Il Cussagl da vaschins

Transit d'inviern in Val Sinestra

A regard il transit d'inviern in Val Sinestra vain praticchè sco d'ürant ils ons passats, in rondond attent sül scumond da transit dals 27 december 1978 dal Cussagl cumünal e sül decret dal Departamaint da güstizia e pulizia chantunal dals 1. favrer 1979.

Scumond

Dals 1. november fin als 30 avrigl esa scumondà da transir cun veiculs a motor sülla via Sent – Sinestra. Il scumond vala davent da l'ür dal god Vaschnuogls/Vita-Parcours fin pro'l Kurhaus Val Sinestra.

Surpassamaints da quist scumond vegnan chastiat in basa als artichels 20 e 30 da la ledscha stradala. Quist scumond es gnü publichà i'l Fögl uffizial dal chantun Grischun dals 16 favrer 1979.

- Il segnal no. 2.01 "Scumond general per trafic cun veiculs a motor" es plazzà a l'ür dal god.
- Avant la Val Vallatscha es impü montada üna barriera.
- Üna barriera es a l'ür dal god.
- In cas da privel da lavinas sun da resguardar las directivas e masüras dal servezzan da lavinas dal cumün da Sent.

Per traffichar faja dabsögn d'ün permiss special dal cumün. I vain montada suot il scumond general üna tabla "exclus cun permiss special dal Cumün". Permiss specials tschüffan be persunas chi han üna incumbensa i'l hotel Sinestra. Tuot ils giasts ston gnir transportats davent da Sent tras l'hotel. Surpassamaints dal **scumond general** vegnan chastiat.

Il Cussagl cumünal

Eleziuns PEB

A la votaziun dals 26 november 2006 vain elet il president da la PEB.

In sia sezzüda dals 2 october 2006, ha decis il Cussagl cumünal da propuoner a sar Men Luppi, Sent sco candidat per quella carica. Sia experienza politica es üna buna basa per surtour quist post pretensius. No eschan persvas ch'el po dar blers impuls per ün bun svilup a la regiun. Il Cussagl giavüscha a la populaziun da dar la vusch a sar Men Luppi.

Il Cussagl cumünal

23 e 30 november a las 20.15: “La lunga via a la glüm”

Umans cun depressiuns patischan (pel solit) sainza gnir inclets. Mo co vain quai ad üna depressiun ? Che as po far ? Che güda ? Infuormaziuns, exaimpels e pussibilità da discussiun per pertocs, confamiliars ed amis.

Manader: Jörg Büchel, ravarenda e cussgliader psicologic IKP

Co-manadra: Lidia Domenig

Ingio: Grotta da cultura, rum./tud. Cuosts: frs. 30.00

Annunzchas pro Jörg Büchel, 081 864 87 28

La Grotta da cultura

7 december 2006 a las 20.00: Güdeus ortodoxs in Engiadina

La stagiun morta es bod a fin. Lura vezzarana darcheu güdeus ortodoxs pro nus. Chi sun quists umans cun lur büschmainta naira ? Che crajan els? E perché vivna uschè oter impè dad “ir cul temp”? Sun els paschaivels o extremists ? Ed es quai vaira, chi cumpraran bod amo oters hotels...?

Üna sairada d’infuormaziun e da discussiun cun sar Friedmann, possessur dal hotel Palace a Nairs. In chasa cumünala. Moderaziun Jörg Büchel. Lingua tudais-cha.

Forum

Baselgia refuormada

Il bazar da la società da duonnas

ha lö als **3 december 2006 a las 13.30 in chasa cumünala**. No vain fat bels arrandschamaints da Nadal, cranzins d’Advent, bleras lavurs da man. Natüralmaing daja ün’ingiavinera ed üna stüva da caffè cun bunas tuortas e panins. No lain far attent, cha no fain eir stinvs e pullovers sün postaziun.

Giuvn e vegl es amiaivelmaing invidà. Grazcha fich ouravant per vos sustegn e per vossa numerusa cumparsa.

La società da duonnas

Advent pels attempats

Eir quist on organischa la società da duonnas ün davomezdi d’Advent per quellas persunas da las annadas 1936 e plü veglias (da 70 amunt). La data es gnüda fixada sün **dumengia, 10 december 2006**, a las 14.00 illa chasa Misoch.

I’ns fess grond plaschair scha tuot quellas persunas gnissan a nossa marena.

Annunzchas piglia incunter Annatöna Pult, tel. 081/864 86 82 opür Vreni Buchli, tel. 081 864 06 77, fin il plü tard als **5 december 2006**.

La società da duonnas

Da dar a fit a Sent

A partir dals 1. favrer o tenor cunvegna, ün’abitaziun da 5 1/2 stanzas, ca. 160 m2 cun 2 loggias vers süd, cheminè, e 2 duschas.

Predsch cumprais cuosts supplementars frs. 1’800.00.

Interessents s’annunzchan suot il nommer da telefon: 078 662 74 94, Christian Benderer, Curtin Sot, Sent

Christian Benderer